

Aktiaateqarluni piginneqataassuteqarlunilu ingerlatseqatigiiffiit pillugit inatsisip (ingerlatseqatigiiffiit pillugit inatsisip) atuutilernissaa pillugu Kalaallit Nunaannut peqqussummut oqaaseqaatissamut Inatsisartut aalajangiiffigisassaattut siunnersuut.
(Inuussutissarsiornermut, Suliffeqarnermut Niuernermut Nunanullu Allanut Naalakkersuisoq)

pillugu

Inuussutissarsiornermut Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Inuussutissarsiornermut Ataatsimiititaliap suliarinninnermini ilaasortarai:
Inatsisartunut ilaasortaq Siverth K Heilmann, Atassut, siulitt.
Inatsisartunut ilaasortaq Aqqaluaq B Egede, Inuit Ataqtigiit, siulitt. tull.
Inatsisartunut ilaasortaq Justus Hansen, Demokraatit
Inatsisartunut ilaasortaq Suka K Frederiksen, Siumut
Inatsisartunut ilaasortaq Iddimanggiu Bianco, Inuit Ataqtigiit

1. Siunnersuutip imarisaa siunertaalu

Naalakkersuisut saqqummiussisutaat siunnersuutillu eqikkarneqarnera peqqusutip imarisaanik nassuiaatinik imaqtartut Inuussutissarsiornermut Ataatsimiititaliap aallarniutigalugu innersuussutigissava. Naalakkersuisut nassuiaataasa uteqqinnissaannut ataatsimiititaliaq tunngavissaqarsorinngilaq, tamatumunngali taarsiullugu peqqusutip imarisai naatsumik oqaaseqarfigissallugit. Tamatuma saniatigut Inuussutissarsiornermut Ataatsimiititaliamit siullertut maluginiarneqarpoq peqqusutissatut missingiut nassiunneqartoq nunatsinni pissutsinut immikkut ittunut naleqqussarneqarsimammat. Tamatumani pingaartumik pineqarput maleruagassat EU-mut ilaasortaamissamik piumasaqaateqarfusut. Maleruagassat taakku peqqusutissatut missingiummi ilaatinneqanngillat, taakku nunatsinni pissutsinut maleruagassiinngimmata.

Ingerlatseqatigiiffiit pillugit inatsisip atuuttup iluarsaanneqarnissaa nutarterneqarnissaalu inatsisissatut siunnersuutip saqqummiunneqartup siunertaraa. Ingerlatseqatigiiffiit pillugit inatsit aktiaateqarluni ingerlatseqatigiiffinnut, ingerlatseqatigiiffinnut assigiinngitsunik pisussaatisinut aammalu piginneqataassuteqarluni ingerlatseqatigiiffinnut ataatsimoorussamik inatsisaavoq, tamatumalu saniatigut aallarnisaasutut ingerlatseqatigiiffiit siunnersuummit maleruagassiorneqarlutik. Aallarnisaasutut ingerlatseqatigiiffiit piginneqataassuteqarluni ingerlatseqatigiiffinnut, 2013-imi ingerlatseqatigiiffiit pillugit

inatsimmut ilanngunneqartunut, assingusumik immikkut iluseqartuusut Ataatsimiititaliamit maluginiarneqarpoq. Aallarnisaasutut ingerlatseqatigiiffiit piginneqataassuteqarluni ingerlatseqatigiiffiupput, tamatumani maleruagassat immikkut ittut ingerlatseqatigiiffimmi aningaasaqarnikkut pissutsinut atuullutik. Aallarnisaasutut ingerlatseqatigiiffik 1 kr.-inik aningaasaatilerlugu ingerlatseqatigiiffittut pilersinneqarsinnaavoq.

Tamatuma kingunerisaanik piginneqatigiiffiup aningaasaataasa 50.000 kr.-nik minnerpaaffeqarnissaannik piunasaqaatip angunissaanut aningaasaatinik piginnittut "sipaarniarnissamut" periarfissaqartinneqarput. Maleruagassani taakkunani siunnerfigineqartut tassaapput aallarnisaasut niuerneramik aallartitsinissamut takorluugallit sapiissusillillu. Taamaattumik siunnerfigineqartut taakku aningaasaqarnikkut killilimmik tunngavissaqarlutik akisussaaffeqarlutillu suliffeqarfimmik namminerisamik aallartitsinissamut inatsisissatut siunnersuummit matumani pineqartumit periarfissinneqassapput. Suliffeqarfimmi pitsaasumik inerikkiartornissamut periarfissaqarpat aallarnisaasutut ingerlatseqatigiiffik inatsisissatut siunnersuutip sinaakkutaasa iluini ineriartortinneqarsinnaassaaq immaqalu piffissanngorpat piginneqataassuteqarluni ingerlatseqatigiiffittut nutaamik nalunaarsorneqarsinnaalluni. Aammattaaq piginneqataassuteqarluni ingerlatseqatigiiffik aningaasaqarnikkut inerikkiartornissamut angissutsimigullu periarfissaqaruni aktiaateqarluni ingerlatseqatigiiffinngornissamut inatsisissatut siunnersuutikkut periarfissinneqassaaq. Tamatuma saniatigut ingerlatseqatigiiffiit pillugit inatsisissatut missingiut inuiaqatigiinnut avatangiiserisanut atatillugu ammasuunissamik annertuumillu ersarissuseqarnissamik piunasaqaateqarpoq.

Aammattaaq naleqqussaananerik pisariillisaanernillu arlalinnik, tassungalu ilanngullugu aktiaateqarluni ingerlatseqatigiiffinnik pilersitsinissamik pisariillisaatinik kiisalu aktiaateqarluni piginneqataassuteqarlunilu ingerlatseqatigiiffinnik uppersaariaatsinik ingerlatseqatigiiffiit pillugit inatsisissatut missingiut imaqarpoq. Kiisalu aalajangersakkanik siulersuisuni qaffasinnerusumillu pisortatut atuuffinni suaassutsit akornanni naligiinnerunissamik siunnersuutaallutillu kajumissaataasunik ingerlatseqatigiiffiit pillugit inatsisissamut missingiut imaqarmat oqaatigineqassaaq. Aningaasaatinut ingerlatseqatigiiffiit aqutsisuini qullersani aqutsisuinilu allani suaassusilinnut ikinaarlugit sinniisulinnut kisitsisigut anguniagassalerneqarnerisigut tamanna pissaaq. Aningaasaatinulli ingerlatseqatigiiffiit aalajangersimasumik annertussusilimmik kaaviiartitaqalerpata aammalu sulisoqalerpata piunasaqaat tamanna aatsaat atuutilissaaq.

2. Siunnersuutip Inatsisartuni siullermeerneqarnera

Siunnersuutip siullermeerneqarnerani partiit oqaaseqaataat oqaatigineqartullu malillugit siunnersuut partiinit tapersorneqarmat Inuussutissarsiornermut Ataatsimiititaliamit oqaatigineqarsinnaavoq. Inatsisartunit politikikkut oqariartuut tamanna Inuussutissarsiornermut Ataatsimiititaliamit tusaatissatut tiguneqarpoq.

3. Tusarniaanermut akissutit

Aalajangiiffigisassatut siunnersuut kiisalu ilanngussaq aktiaateqarluni piginneqataassuteqarlunilu ingerlatseqatigiiffiit pillugit inatsisip (ingerlatseqatigiiffiit pillugit inatsisip) atuutlernissaa pillugu Kalaallit Nunaannut peqqussummut missingiutitut iluseqartoq, piffissami 2015-imi decembarip 9-aniit 2016-imi januaarip 23-ianut Namminersorlutik Oqartussat tusarniaanermut nittartagaanniippoq. Aammattaaq siunnersuut tusarniaaffigineqartunut aalajangersimasunut nassiunneqarpoq.

Sulisitsisunit, Sermersuup Kommunianit, Kalaallit Nunaanni Eqqartuussissuserisunit aamma GrønlandsBANKEN-imit tusarniaanermut akissuteqartoqarpoq. Tusarniaanermut akissuteqaatit tiguneqartut annertunerpaatigut neriulluarnartumik nipeqarput.

Tulliuttuni tusarniaanermut akissuteqaatinit tiguneqartunit oqaaseqaatit, pingaaruteqarnerannik nalilersuineq aallaavigalugu, tigulaariffigineqarput oqaaseqarfigineqarlutillu.

3.1 Inuussutissarsiornermut Ataatsimiititaliap tusarniaanermut oqaaseqaatai

Tusarniaanerup sivilisussiat oqaaseqarfiginissaanut ataatsimiititaliaq tunngavissaqarsorinngilaq. Atortussat tusarniaaffigisanut ikittuinnarnut nassiunneqarsimasut ataatsimiititaliap paasivaa. Inatsisissatut siunnersuutip teknikkkut pisariunera maleruagassiorneqartullu immikkuullarinnerat pissutigalugit Inuussutissarsiornermut Ataatsimiititaliamit tamanna paasisinnaavaa. Tusarniaanermulli akissutitut qitiusunut ataasiakkaanut naatsumik oqaaseqaateqarnissamut ataatsimiititaliaq pissutissaqarsoraq.

Kalaallit Nunaanni Eqqartuussissuserisut allapput, ingerlatseqatigiiffinnik aallarnisaasunik atuutsitsilernerme pinngitsaaliissummik atorunnaarsinneqartut akiliisinnaajunnaartullu amerinissaannut aarlerinaateqartitsisoqalissasoq, taamatullu akiliisinnaajunnaartut il.il. amerlanerulerneranni Kalaallit Nunaanni eqqartuussiviit tatisimaneqarnerulersinnaasut. Taamaattumik peqatigiiffiup inassutigaa, Danmarkimit misilittakkat takoreernissaasa tungaanut, aalajangersakkat Kalaallit Nunaannut atuutsinneqalernissaat utaqqisinneqassasoq.

Naalakkersuisut Kalaallit Nunaanni Eqqartuussissuserisunut akissutaat

Aallarnisaasutut ingerlatseqatigiiffiit nutaatut aaqqissuussaammata ilumoorpoq, tassani aningaasaatinik aallarniuteqarani ingerlatseqatigiiffittut ilusilimmik suliffeqarfiliornissaq ajornarunnaarsinneqarluni. Ingerlatseqatigiiffittut ilusilimmik suliffeqarfimmik ingerlatsisinnaanissami iluaqutissartaasunut peqatigitillugu, ingerlatseqatigiiffik taamaattoq taamatuttaaq piumasqaatinik arlalinnik naammassinnittussaavoq, ilanngullugit nalunaarsorneqarneq, naatsorsuutunik saqqummiisarneq kiisalu ingerlatseqatigiiffimmi

sinneqartoorutit ilaasa ileqqaartarnissaat pillugit, taamatullu 50.000 koruuninik ileqqaareernissap tungaanut sinneqartoorutit ingerlatseqatigiiffimmit tiguneqarsinnaassanatik, taanna ApS-imut aningaasaatinut piumasaqaammut naapertuulluni.

Danmarkimi ingerlatseqatigiiffiup ilusaa nutaaq taamatuttaaq tassani pineqarmat, ingerlatseqatigiiffinnut taakkununga annertoorsuarnik misilittagaqartoqanngilaq, taamaattumillu taakkuninnga atuineq qanoq ineriartussanersoq erseqqinnerusumik oqaatigineqarsinnaanngilaq. Taamaattoq ingerlatseqatigiiffinnut allanut naleqqiullugu, ingerlatseqatigiiffiit taakkua akiliisinnaajunnaarnernik aamma pinngitsaaliissummik atorunnaarsinneqarnernik nalaataqartassasut oqaatigissallugu tunngavissaqanngilaq, tassani ilaallutik suliffeqarfinnut inummit ataasiinnarmit pigineqartunut sanilliullugit. Piumasaqaatit annertunerusut, aallarnisaasutut ingerlatseqatigiiffinnut piumasaqaatigineqartartussat, taamatut ingerlatseqatigiiffimmik ilusiliillutik aallartittartussat pimoorussisuunissaannik qulakkeerissasut, taamaattoq ilimagineqarpoq.

Tamatuma saniatigut aallarnisaasutut ingerlatseqatigiiffik suliap pissusissamisoornerani pisariusuunngitsumik iluseqassaaq, tassani pigisat aningaasartuutillu naatsorsornissaat pisariitsuussalluni.

Inuussutissarsiornermut Ataatsimiititaliap oqaaseqaatai

Ingerlatseqatigiiffiit pillugit inatsisip taama nutarterneqarnerani aaqjissuussineq nutaaq taamaattoq nalorninartoqarlunilu iluaqutissartaqartoq ataatsimiititaliamit oqaatigineqassaaq. Aallarnisaasutut ingerlatseqatigiiffiit aallaavittut isigalugu suliffeqarfinnut inummit ataatsimit pigineqartunut sanilliullutik unammilleqatigiinnermit navianartorsiortinneqarnerusutut qajannarnerusutullu Inuussutissarsiornermut Ataatsimiititaliamit isigineqanngillat. Akerlianik suliffeqarfiit taamaattut ingerlatseqatigiiffittut ilusilerlugit ingerlanneqarsinnaanerat iluaqutissartaqartoq ataatsimiititaliaq isumaqarpoq. Tamatumani uppernarsaasiinissamik naatsorsuutinillu saqqummiussisarnissamik piumasaqaatit eqqarsaatigineqarlutik. Aallarnisaasutut ingerlatseqatigiiffiit Kalaallit Nunaanni atuutsinneqalernissaasa akuerineratigut Naalakkersuisut iluaqutissartai ajoqutissartaalu sukumiisumik isumaliutigisimassagaat ataatsimiititaliamit tutsuigineqarpoq.

GrønlandsBANKEN (GB) isumaqarpoq, naalagaaffeqatigiinnerup iluani ingerlatseqatigiiffinnut atugassarititaasut assigiiarnissaat Namminersorlutik Oqartussat qulakkiissappassuk, tamanna ataatsimut isigalugu naleqquttoq. GB-p erseqqissarppaa siunnersuummi siunnerfigineqartutut kalaallit suliffeqarfiisa IT atorlugu aaqqiissutissanik atuinissamut periarfissaqarnissaat pingaaruteqartorujussuartut nalilerneqartoq.

Naalakkersuisut akissutaat

Suliffeqarfiit kalaallinit pigineqartut taamatuttaaq digitalimik atsiornernik ilaalu ilanngullugit atuisinnaanissaasa qulakkeerneqarnissaa siunertaralugu, ingerlatseqatigiiffinnut inatsimmut nutaamut nangissutigalugu, taamatuttaaq suliniutit aallartinneqarput. Taamaalilluni tamatuma qulakkeerneqarnissaa siunertaralugu suliniutinik aallartitsisoqareerpoq.

Inuussutissarsiornermut Ataatsimiititaliap oqaaseqaatai

Peqqussutissatut siunnersuummi § 9-mi allassimavoq peqqussut taanna malillugu paasissutissat nalunaarsorneqartussaasut inatsisitigut pilersitsilluni aalajangiinerup kingusinnerpaamik sapaatit akunneri tallimat kingorna Erhvervsstyrelsen qarasaasiaqarfianut ilanngunneqarsimassasut. Ingerlatseqatigiiffiit pillugit inatsisip nutaap nassatarisaanik Danmarkimi pisortatigoortumik nalunaarsuiffinnut elektroniskimik nalunaaruteqartarnissamik pisariaqartitsineq annertusissaaq. Tassunga atatillugu Kalaallit Nunaanni GER normunik Danmarkimilu CVR normunik nalunaarsuiviit akornanni teknikikkut imminnut assortuuttoqalinnginnissaa qulakkeerneqartariaqarpoq. Ajornartorsiut tamanna Naalakkersuisunit eqqumaffigineqartoq Inuussutissarsiornermut Ataatsimiititaliamit ilimagineqarpoq, taamaalilluni nunatsinni suliffeqarfiit tamatuminnaga ajornartorsiuteqaqqunagit. Naalakkersuisut GrønlandsBANKEN-imut akissutaat ataatsimiititaliamit ima paasineqarpoq ajornartorsiut tamanna Naalakkersuisunit eqqumaffigineqartoq.

5. Ataatsimiititaliap siunnersuummik suliarinninnera

Peqqussutissatut siunnersuutip matuma siullermeerneqarnera Inuussutissarsiornermut Ataatsimiititaliamit aallarniutigalugu innersuussutigineqassaaq, tamatumani siunnersuut ataatsimut isigalugu taparserneqarluni. Nunatsinni inuussutissarsiutinik ineriartortitsineq ingerlatiinnassagutsigu nunatta ineriartornissaa siuarsarniarlugu nunani allani soqutiginnittunik suleqateqartariaqartugut Inuussutissarsiornermut Ataatsimiititaliaq naliliivoq. Aningaasalersuisussanik suliffeqarfinnullu kajumissuseqartitsilernissamik kissaateqarneq piviusunngortinneqassappat inatsisip suliassaqarfimmi tamatumani nunani tamalaani ineriartortitsinerneq naleqqussarneqarnissaa pisariaqarpoq. Taamaattumik maleruagassanik nunatsinni ingerlatseqatigiiffinnik maleruagassiisunik maanna nutarterineq Inuussutissarsiornermut Ataatsimiititaliamit iluarisimaarneqarpoq.

Peqqussutissatut siunnersuummi saqqummiunneqartumi takuneqarsinnaasutut nutartikkat arlaqarput. Ataatsimut isigalugu inatsisissatut siunnersuummi allannguutit pingaarnerit ilaat ilaatigut tassaapput IT-mik naleqqussaannerit kiisalu nalunaarsuineq maanna elektroniskimik ingerlanneqartalissammat.

Peqqussutissatut siunnersuut assersuutigalugu aktiaatinik 5 %-imik piginnittut pisortat

oqartussaasuinit maanna takuneqarsinnaalernissaat piginnittullu pillugit paasissutissat internetimi takuneqarsinnaalernissaat pillugit aalajangersakkanik nutaanik imaqartoq Inuussutissarsiornermut Ataatsimiititaliamit maluginiarneqarpoq.

Piginnittut kinaassusersiniartarnerannik pisariinnerulersitsinissaq ersarinnerulersitsinissarlu siunertarineqarpoq, tamatumalu kingunerisaanik innuttaasut paasissutissanik taamaattunik internetimi namminneq qanoq nassaarsinnaanerannut innersuussutinik ilitersuutinillu arlalinnik tamatuma peqatigisaanik suliaqartoqarsimalluni. Ingerlatseqatigiiffinnut maleruagassiornermut atatillugu ammasuunissamik ersarissuunissamillu suliniutit pitsaasuusut inuiaqatigiinnullu avatangiiserisanut iluaqutaasut Inuussutissarsiornermut Ataatsimiititaliaq isumaqarpoq. Ataatsimut isigalugu peqqussutissatut siunnersuut matumani pineqartoq nunatsinni ingerlatseqatigiiffinnut inuiaqatigiinnullu pitsaasumik sinaakkusiissasoq ataatsimiititaliaq isumaqarpoq.

6. Siunnersuutip aningaasaqarnikkut kingunerisassai


Siunnersuutip aningaasaqarnikkut kingunerisassai Naalakkersuisut saqqummiussissumminni nalunaarpaat. Atortussat pigineqartut tunngavigalugit allatut naliliinissamut ataatsimiititaliaq tunngavissaqarsorinngilaq.

7. Ataatsimiititaliap inassuteqaatai

Ataatsimiititaliap isumaqatigiittup siunnersuut akuerineqassasoq inassutigaat.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

Pua.




Siverth K Heilmann

Siulittaasoq



Aqqaluaq B Egede


Siulittaasup tullia



Justus Hansen



Suka K Frederiksen



Iddimanggiu Bianco